

दिनांक 09.03.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- संसद रे बजट सत्र रो दूजो चरण काले सूं सरू व्हेला।
- मुख्यमंत्री भजनलाल शर्मा कयो— राइजिंग राजस्थान इन्वेस्टमेंट समिट रे तैत व्हीया **एमओयू** ने धरातल माथे लावण खातिर जोरदार जतन कर रिया है।
- प्रदेश मांय गर्मी रे असर मांय बढ़ोतरी—बाडमेर मांय दिन रो तापमान 38 डिग्री सैल्सियस रे पार।
- आईसीसी चैंपियंस क्रिकेट ट्रॉफी रे फाइनल मुकाबले मांय न्यूजीलैण्ड भारत रे सामे जीत खातिर 252 रन रो लगस राख्यो है।

संसद रे बजट सत्र रो दूजो चरण काले सूं सरू व्हेला। सत्र रो ओ चरण 4 अप्रैल तांई चालेला, जिण मांय 20 बैठकां व्हेला। वित्त मंत्री निर्मला सीतारामन काले मणिपुर खातिर बजट पेश करेली। लारला म्हीना मुख्यमंत्री **एन. बीरेन सिंह** रे इस्तीफे रे पाछे राज्य मांय राष्ट्रपति शासन लागू है। सत्र रे चालता बरस 2025–26 खातिर अनुदान मांगां अर संबंधित विनियोग विधेयक माथे चर्चा अर मतदान करयो जावेला।

राज्य विधानसभा मांय काले राजस्थान पशु चिकित्सा अर पशु विज्ञान विश्वविद्यालय बीकानेर रा वार्षिक प्रतिवेदन, सदन मांय राख्या जावेला। पशुपालन अर डेयरी मंत्री जोराराम कुमावत ओ प्रतिवेदन रखेंला। इण रे अलावा उद्योग तथा वन अर पर्यावरण महकमा री अनुदान मांगां माथे विचार अर मतदान व्हेला। वठी ने न्यारी न्यारा याचिकावां दी जावेला।

मुख्यमंत्री भजनलाल शर्मा कयो है कि राइजिंग राजस्थान ग्लोबल इन्वेस्टमेंट समिट रे तैत व्हीया **एमओयू** ने धरातल माथे लागू करणे री दिशा मांय प्रभावी रूप सूं काम करयो जा रियो है। श्री शर्मा आज मुख्यमंत्री निवास माथे समिट रे तैत व्हीया **एमओयू** रा क्रियान्वयन री समीक्षा कर रिया हा।

इण रे चालता वणा संबंधित विभागां ने **एमओयू** री क्रियान्विति खातिर आपसी तालमेल रे साथे काम करणे अर इण री लगोतार मॉनिटरिंग करणे रा हुकम दिया। वणा कयो कि प्रदेश ने 350 बिलियन डॉलर री अर्थव्यवस्था बणाणे रे लगस रे साथे काम कर री है। वणा रीको ने प्रदेश मांय नुवा औद्योगिक खेतर खातिर जमीन री संभावना तलाश करणे रो भी कयो। बैठक मांय मुख्य सचिव सुधांशु पंत अर न्यारा न्यारा महकमा रा आला अहलकार मौजूद रिया।

आज नई दिल्ली मांय राष्ट्रीय स्वास्थ्य अर परिवार कल्याण संस्थान रे 48वें वार्षिक दिवस जळसे मांय बोलता थकां वणा कयो कि सरकार लोगां खातर स्वास्थ्य सेवा ने सुलभ अर किफायती बणा

री है। वणा ओ भी कयो कि देश मांय मेडिकल कॉलेजां री संख्या 2014 मांय तीन सौ 80 ही जिको 2024 मांय दुगणी सूं भी बत्ती होर सात सौ 87 व्हे गयी है। श्रीमती पटेल कयो कि देशभर मांय अखिल भारतीय आयुर्विज्ञान संस्थान री संख्या भी छह सूं बध र 22 व्हे गयी है।

केंद्रीय पर्यावरण, वन अर जलवायु परिवर्तन मंत्री भूपेन्द्र यादव मध्यप्रदेश रा माधव राष्ट्रीय उद्यान ने देश रो 58वों बाघ अभयारण्य बणाया जावण री घोषणा करी है। एक सोशल मीडिया पोस्ट मांय श्री यादव कयो कि आ सगळा वन अहलकारां रे लगोतार जतन रो प्रमाण है जका वन्य जीवन संरक्षण खातिर निःस्वार्थ भाव सूं काम कर रिया है। श्री यादव री पोस्ट माथे प्रतिक्रिया जताता थकां प्रधानमंत्री नरेंद्र मोदी कयो भारत वन्यजीव विविधता अर वन्य जीवन ने महत्त्व देणे री संस्कृति वाळो देश है। सोशल मीडिया पोस्ट मांय श्री मोदी कयो के सरकार वन्य जीवां री सुरक्षा अर धरती माथे पर्यावरण संरक्षण मांय सदां ही सब सूं आगे रेवेली।

प्रधानमंत्री नरेन्द्र मोदी आज नई दिल्ली रा एम्स रो दौरा करयो अर उपराष्ट्रपति जगदीप धनखड़ रे स्वास्थ्य रे बारे मांय जाणकारी ली। प्रधानमंत्री वां ने चोखे स्वास्थ्य अर बेगो ही ठीक होणे री प्रार्थना करी। उपराष्ट्रपति धनखड़ ने बेचैनी री शिकायत पाछे काले रात सफाखाना मांय भर्ती करायो गयो हो। सूत्रां रे मुजब श्री धनखड़ री हालत फिलहाल स्थिर है।

राज्यपाल हरिभाऊ बागडे कयो है कि **नेत्रदान महादान** है। इण रे खातिर बत्ती ऊं बत्ती लोगां ने प्रेरित कर्यो जावे। वणा कयो कि देश मांय लगे-टगे सवा करोड़ लोग दृष्टिहीन हैं। अंधता निवारण मांय नेत्रदान री संस्कृति विकसित करणे मांय सगळा साथ देवे। श्री बागडे आज **‘आई बैंक सोसायटी आफ राजस्थान’** री कानी सूं राख्यी ज्यी **‘नेत्रदानी परिवार सम्मेलन समारोह’** मांय बोल रिया हा। वणा नेत्रदान सूं जुड्या पिरवारां रो अभिनंदन अर स्वागत करता थकां वां ने सम्मानित भी कर्यो। वणा कयो कि मरणे सूं पैल्यां नेत्रदान रो संकल्प कर यदि मिनख आपरी आंख्यां दान कर जावे तो देश रा सगळा नेत्रहीन मिनखा ने एक ही बरस मांय आंख्या मिल जावेली। जळसा मांय **‘आई बैंक सोसायटी ऑफ राजस्थान’** रा अध्यक्ष डॉ. बी.एल. शर्मा नेत्रदान जागरूकता खातिर कर्या जा रह्या जतनां रे बारे मांय विस्तार सूं जाणकारी दीनी। वठी ने जयपुर रा इन्दिरा गांधी पंचायतीराज संस्थान मांय राख्यी ज्या समता जळसा मांय भी राज्यपाल शिरकत करी। वणा समता रा भाव सूं सगळा ने देखणे अर छुआछूत नी करणे री अरज करी। इण रे चालता श्री बागडे संविधान निर्माण मांय योगदान देवण वाळा महापुरुषां ने याद करता थकां भारत ने ओजू विश्व गुरु बणावण खातिर काम करणे माथे जोर दियो।

होळी रो त्यौहार नजदीक आवण रे साथे ही प्रदेशभर मांय तैयारियां करी जा री है। राज्य मांय न्यारी न्यारी ठोडां माथे फागोत्सव राख्या जा रिया है। राजधानी जयपुर मांय आज सूं गलता तीर्थ माथे फागोत्सव री सरूआत व्ही। देवस्थान महकमा री कानी सूं हो रिया इण उत्सव मांय कीर्तन, महाआरती अर न्यारी न्यारी होडां राख्यी गई। हनुमानगढ मांय काले 501 ध्वजावां रे साथे फागोत्सव रैली निकाळी ज्यी। जैसलमेर रा गोविन्दसर गिरिराज जी मांय होरी रसिया अर फाग गाणा हो रिया है। डीग मांय आज सूं दो दिन रा बृज होळी जळसे री सरूआत व्ही। वठी ने भरतपुर मांय काले निकळण वाळी शोभायात्रा री तयारियां करी जारी है। झुंझुनूं साथे न्यारा न्यारा जिलां मांय पुलिस पलैंग मार्च कर शांतिपूर्ण अर सुरक्षित रूप सूं होळी मनाणे रो संदेश दे री है। करौली मांय आं दिनां फागोत्सव राख्यो जा रियो है। शहर रा खास मदन मोहन जी मिन्दर साथे

ग्रामीण अंचलां मांय भी होळी गीतां रा कार्यक्रम राख्या जा रिया है। और ब्योरो म्हाणा संवाददाता सूं—

उठी ने सीकर जिला रा प्रसिद्ध खाटूश्याम जी मांय चाल रिया फागुणी मेळो परवान माथे है। म्हाणा संवाददाता बतायो कि काले एकादशी रे मौके माथे श्याम मिन्दर सूं रथ यात्रा निकाळी जावेली। इण खातिर 125 किलो चांदी सूं बण्योडो रथ तैयार करयो गयो है।

झालावाड़ जिला रा झालरापाटन मांय द्वारकाधीश मिन्दर री 62वीं पंचकोसी परिक्रमा आज पूरी व्ही। इण परिक्रमा मांय आसे-पासे रे जिले रे साथे मध्यप्रदेश सूं घणी तादाद मांय श्रद्धालु भेळा व्हा।

आईसीसी चैंपियंस पुरुष क्रिकेट ट्रॉफी रे फाइनल मुकाबले मांय न्यूजीलैंड भारत रे सामे जीत खातिर 252 रनां रो लगस राख्यो है। दुबई मांय खेल्या जा रिया इण मैच मांय न्यूजीलैंड टॉस जीतर पैला बल्लेबाजी करणे रो फ़ैसलो कर्यो। न्यूजीलैंड री टीम 7 विकेट रे नुकसान माथे 251 रन बणाया। सब सूं बत्ती 63 रन **डेरिल मिचेल** बणाया। भारत री कानी सूं वरुण चक्रवर्ती अर कुलदीप यादव दो-दो विकेट लिया। टूर्नामेंट मांय भारत री टीम अजे ताई कोई भी मैच नी हारयो है।

भारत लीग चरण मांय बांग्लादेश, पाकिस्तान अर न्यूजीलैंड माथे प्रभावशाली जीत रे पाछे सेमीफाइनल मांय ऑस्ट्रेलिया माथे रोमांचक जीत दर्ज करी।

अंतर्राष्ट्रीय महिला दिवस कार्यक्रमां री कड़ी मांय आज जैसलमेर मांय भाजपा महिला मोर्चा रा कार्यकर्तावां री कानी सूं रक्तदान शिविर राखीज्यो। राजकीय जवाहर चिकित्सालय मांय राखी ज्या इण शिविर मांय घणी तादाद मांय महिलावां आपरी भागीदारी निभाई। वठी ने बाडमेर रा आदर्श स्टेडियम मांय चाल रिया जिला स्तरीय **राज सखी मेळो** आज परवान माथे रियो। म्हाणा संवाददाता बतायो कि मेळे मांय खरीददारी करणे घणी तादाद मांय लोग पहुंच्या।

प्रदेश मांय गर्मी रे असर मांय बढोतरी होवण लागी है। दिन मांय तेज धूप सूं गर्मी रो एहसास बण्योडो है। हालांकि रात रा बगत मामूली ठंड रो असर बण्योडो है। लारला चौबीस घंटा मांय बाडमेर मांय दिन रो पारो 38 दशमलव 4 डिग्री सेल्सियस दर्ज करयो गयो। म्हाणा संवाददाता बतायो कि तेज गर्मी रा असर सूं जनजीवन प्रभावित व्हीयो है। चित्तौडगढ, डूंगरपुर, जैसलमेर, बीकानेर, जोधपुर, जालौर अर पाली समेत केई जगह दिन रो तापमान 35 डिग्री सेल्सियस सूं बत्ती दर्ज व्हीयो। जयपुर, जोधपुर, कोटा अर उदयपुर साथे केई शहरां मांय बत्ती ऊं बत्ती तापमान सामान्य सूं ऊपर रियो। मौसम केन्द्र जयपुर रे मुजब आवता चार-पांच दिन मौसम सूखो रेवेला अर गर्मी मांय थोड़ी बढोतरी व्हे सके है। धुलंडी अर वीणे अगले दिन श्रीगंगानगर अर हनुमानगढ जिळे मांय बादळ छाया रेहणे रा आसाड है।

केंद्रीय कानून मंत्री अर्जुन राम मेघवाल कयो कि केंद्र सरकार रेलवे श्रमिकां रा हितां ने लेर प्रतिबद्ध है। श्री मेघवाल आज बीकानेर मांय भारतीय रेलवे मजदूर संघ रे 21वें त्रैवार्षिक अधिवेशन रे दूजे दिन राख्या गया कार्यक्रम मांय बोल रिया हा। वणा कयो कि केंद्र सरकार कानी सू आठवों वित्त आयोग रो गठन कर दियो गयो है अर आयकर छूट री सीमा मांय बधोतरी करीजी है। श्री मेघवाल कयो के केंद्र सरकार पहली बार नेशनल लिटिगेशन पॉलिसी लाई है। वणा तीन नुवा आपराधिक कानूनां रो जिकर करता थकां कयो कि सरकार अंग्रेजां रे पुराणे कानूनां मांय संशोधन करता थकां वां ने सरल रूप सू पेश करता व्हीया लागू कर दियो है।

अलवर जिळे रा भिवाड़ी मांय आज तड़के कार मांय आग लागणे सू एक मोट्यार री मौत व्हेगी अर तीन दूजा जणा घायल व्हे ग्या। ओ हादसो उण बगत व्हयो जदे कार सड़क रे कने खड्या रोलर सू टकरा गयी। टकराणे पाछे आग लागणे सू कार बळ गयी। हादसा पाछे मौके माथे पंहुची पुलिस स्थानीय लोगां री मदद सू घायलां ने उपचार खातिर सफाखाना भेज दियो।

जयपुर मांय चाल रिया इंटरनेशनल इंडियन फिल्म एकेडमी-आईफा अवॉर्ड्स रे दूजे दिन सिल्वर जुबली सेलिब्रेशन री सरू व्हे चुकी है। आज **आईफा अवार्ड्स दिया जावेला। इण सू पैल्यां आज** जयपुर रा राज मन्दिर सिनेमा हॉल मांय फिल्म शोले री स्पेशल स्क्रीनिंग राखी ज्यी। इण मौके माथे उप **मुख्यमंत्री** दिया कुमारी भी पहुंचीं अर वणा राज मंदिर सू जुड़ी आपरी यादां साझा करी। आईफा अवॉर्ड्स नाईट मांय राजस्थान री समृद्ध संस्कृति भी मंच माथे निजर आवेली। इण से चालता 150 सू बत्ती लोक कलाकार आपरी प्रस्तुतियां देवेला। इण सू पैल्यां काले **ओटीटी** रा कलाकारां ने डिजिटल अवार्ड्स दिया गया।
